



STINAPA TA INFORMA

Kon nos por frena kresementu di seru di sushi?
Pa kuminsá mester produsí menos sushi...

Tur hende ta produsí sushi. Ora nos hasi kompra, tur kos ta paketá den material manera kaha di karton, saku di material artifizial i bòter di plèstik. Banda di esei nos ta benta hopi kos afó manera sobrá di kuminda, sushi di kurá, material pa fèrf i di konstrukshon i tayer bieu. Na Boneiru kada unidat familiar ta produsí 1,6 tonelada di sushi pa aña. Esei ta nifiká un total di 9000 tonelada di sushi di kas. Banda di esei negoshinan ta produsí 4300 tonelada di sushi pa aña. E dùmpt na Lagun tin 13 aña den funshon kaba, pero lo ta yen denter di 5 aña. Tur dia ta entregá 130 tonelada di sushi na landfill. Nos no ta para semper ketu na e echo ku hopi kos ku nos ta usa ta produsí sushi i ki tipo di sushi e ta. Sierto materia ta mas dañino ku e otro pa hende i pa naturalesa. Produkshon di materia tambe tin influensha riba nos medio ambiente. Asina tin di kap palu pa produkshon di papel. Di e forma ei sierto animal ta pèrdè nan ambiente natural i e suela por sufri eroshon (si no planta di nobo). P'esei ta mihó nos usa papel na un manera ekonómiko òf usa papel resiklá. Kiko nos ta hasi ku e kosnan ku nos ta tira afó? Na Boneiru Selibon ta hiba tur landfill. Ta bon ku nos ta kolektá e sushi pa no polushoná nos medio-ambiente. Prevenshon ta e método preferí pa anda ku sushi, sigui pa resiklahe i na di tres lugá tratu di e produkto final na un manera responsabel. Ora ta dùmpt algu e ta keda eksistí pa hopi tempu i e sushi ta sigui akumulá. Na Boneiru material venenoso por drenta den suela pasobra no ta seya e sushi. Kiermen mas nos tira afó, ta mas grandi e seru di sushi ta bira i mas grandi e riesgonan ta pa medioambiente. Kon nos por redusí kresementu di e seru di sushi? E promé paso ta pa perkurá ku tur hende ta produsí ménos sushi. E meta prinsipal di maneho antiano pa loke ta sushi ta, pa redusí e kantidat di sushi produsí. Ora di kumpra kos nos por pensa un ratu ki tipo di sushi e ta produsí. Pensa por ehèmpel pa evitá di kumpra produktonan pre-paketá. Òf skohe pa produktonan di kua por usa e empake mas ku un biaha. Asina por kolektá bòter di glas separá na Boneiru, pero bòter di plèstik nò. Tambe nos ta haña ménos sushi dor di usa ménos produkto pa tira afó. Asina nos por skohe por ehèmpel pa produktonan ku ta krea ménos sushi dañino (manera fèrf a base di awa, radio ku ta traha riba koriente na lugá di bateria) i... kon ekonómiko nos ta ku nos tayernan di outo? Asina nos tin un kantidat di eskoho. Ta un keston di ta konsiente i hasi nos parti!
Skirbí pa Ellie Noij, tradusí pa Marcel Nahr.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURELESA



Traha huntu na un desaroyo duradero pa Boneiru